

Mál nr. 7

Knattspyrnudeild Selfoss gegn Knattspyrnudeild Hauka

Kæra Selfoss

Dómkröfur

Að Selfossi verði dæmdur sigur í leik gegn Haukum í 4. flokki karla sem fram fór 10. júlí.

Málavextir

Leikmaður númer 10 hjá Haukum Andri Geir Gunnarsson var rekinn af leikvelli með rautt spjald í leik Hauka og ÍBV. Lék svo næsta leik í Íslandsmóti gegn okkur (Selfossi) en hefði átt að vera í leikbanni samkvæmt reglugerð KSÍ.

Lagarök

Vísun til Reglugerð KSÍ um knattspyrnumót 4.4 ólöglega skipað lið og starfsreglur aganefndar KSÍ 5.2 viðurlög gegn brotum.

Sönnunargögn

Leikskýrslur úr viðkomandi leikjum.

Virðingarfyllst,

f.h. knattspyrnudeildar Selfoss

Jón Ágúst Jónsson

Greinargerð frá þjálfara Hauka

Tilgangurinn með þessu bréfi er að leiðrétta þann misskilning sem átt hefur sér stað með þeim skelfilegu afleiðingum að 4. flokkur Selfoss A-liða í knattspyrnu hefur ákveðið að kæra leik þeirra á móti Haukum sem leikinn var á Ásvöllum 10. júlí s.l. Sú ástæða sem gefin er upp að einn leikmanna Hauka, Andri Geir Gunnarsson, hafi verið úrskurðaður í leikbann af aganefnd KSÍ og því ólöglegur í umræddum leik.

Þetta er allt saman satt og rétt nema það að í þeim leik sem Andra á að hafa verið vísað út af var Kristjání Karli Gunnlaugssyni vísað af velli en þar sem hann bar sömu tölu á bakinu og Andri skrifaði dómari að sjálfsögðu þá tölu í bók sína.

Þegar leiðrétta átti málið urðu málsatvik fyrst flókin þegar kom í ljós að gleymst hafði að skrifa nafn Kristjáns Karls á leikskýrsluna bæði sem varamaður A-liðs og sem leikmaður í byrjunarliði B-liðs sem gerði mönnum enn erfiðara um vik að útskýra málin.

Undirritaður hafði samband við KSÍ og ræddi þar við Klöru Bjartmarz starfsmann sambandsins sem tók vel í að skoða málið. Þegar hins vegar umrædd mistök urðu ljós með nafnaleysið á skýrslunni óskaði Klara eftir því að haft yrði aftur samband en þar sem hún væri á leiðinni í frí myndi Ómar Smáráson annar starfsmaður sambandsins taka við málinu.

Eftir að undirritaður hafði ráðfært sig við bæði formann unglíngaráðs og framkvæmdarstjóra knattspyrnudeildar Hauka hafði hann samband við Ómar þá strax eftir helgina sem sagði eftir að hafa hlustað á málsatvik að “þetta yrði ekkert mál” og því varð úr að Andri Geir var settur á skýrslu í næsta leik sem fram fór eins og áður sagði 10.07.2003

Þetta eru málsatvik í hnotskurn en svo rétt til að kasta örlitlu betra ljósi á málið eru hérna nokkrar staðreyndir til viðbótar:

Ákvörðun þjálfarans að skipta Kristjáni Karli inn á í seinni hálfleik var til þess að leyfa honum að spreyta sig með sínum jafnöldrum en hann er að staðaldri að leika með sér ári yngri strákum í B-liðinu. Þetta er liður í að halda drengjunum við efnið. Leikmaðurinn var minna en mínútu inn á þegar einhver fór illa í hæl hans með þeim afleiðingum að hann sló til leikmannsins og fékk rautt fyrir. Undirritaður fékk svo undanþágu hjá þjálfara ÍBV um að leyfa stráknum að spila með B-liðinu þar sem hann hafði ferðast alla þessa leið og móðir hans einnig. Dómarinn var látinn vita svo hann getur vitnað um það.

Kristján Karl er mjög svo áberandi í útliti þar sem hann er dökkur yfirlitum og með gat í tungu svo það er hægðarleikur að greina á milli hans og Andra í útliti.

Undirritaður hafði heyrt frá strákum í 4.flokki strax eftir leikinn að rætt hefði verið á meðal áhorfenda Selfoss að kæra leikinn sökum þess að dómarnir hefðu verið tveir en ekki einn og tveir aðstoðardómarar. Þessir sömu aðilar höfðu verið með mikil köll á dómara leiksins sem geta vitnað um það og var framkoma þeirra ekki til að hrópa húrra fyrir.

Þess má að lokum geta að þar sem ekki voru allar kennitölur á hreinu hélt undirritaður leikskýrslunni hjá sér til þess að klára hana og senda sem var gert. Ekki hefði verið mikið mál að “lagfæra” nöfn, en það er ekki siður okkar hér í Firðinum að koma óheiðarlega fram.

Ég vona því svo sannarlega að lítil mistök hafi átt sér stað við skýrslugerð í 4. flokki komi ekki til með að kosta drengi tár eftir að hafa lagt sig alla fram í umræddum leik og uppskorið samkvæmt því.

Með von um jákvæð viðbrögð

Andri Marteinnsson

Þjálfari 4.flokks Hauka

Úrskurður Dómstóls KSÍ

Ár 2003, föstudaginn 25. júlí, er dómþing haldið hjá dómstól KSÍ af Hilmari Gunnlaugssyni dómara. Fyrir er tekið málið nr. 7/2003, Knattspyrnudeild Selfoss gegn Haukum, knattspyrnudeild. Dómþing þetta er háð á símatorgi Landssímans. Mættir eru í réttinn Jón Ágúst Jónsson unglingaráðsmaður hjá kæranda og Daði Rafnsson framkvæmdastjóri kærða.

Lagt er fram:

Nr. 1. Kæra knattspyrnudeildar Selfoss.

Nr. 2. Leikskýrsla v/leiks ÍBV og Hauka í 4. fl. þann 30. júní 2003.

Nr. 3. Leikskýrsla v/leiks Hauka og Selfoss í 4. fl. þann 10. júlí 2003.

Nr. 4. Greinargerð kærða.

Til þessa dómþings var boðað með tölvubréfum, sendum þann 23. júlí og 24. júlí. Farið er yfir framlögð skjöl og staðfesta aðilar að þeir hafi þau öll undir höndum. Ákveðið er að flutningur málsins verði munnlegur. Af hálfu aðila er þess óskað að eftirtaldir aðilar mæti fyrir dóminn við flutning málsins.

Af hálfu kæranda:

Sverrir Ingibjartsson, þjálfari 4. fl. kæranda.

Af hálfu kærða:

Haraldur S. Magnússon, dómari leiks ÍBV og Hauka í 4. fl.

Andri Geir Gunnarsson, leikmaður 4. flokks kærða.

Kristján Karl Gunnlaugsson, leikmaður 4. flokks kærða.

Ákveðið er að flutningur málsins fari fram miðvikudaginn 6. ágúst n.k. kl. 11:00, á skrifstofu KSÍ, Laugardal. Aðilar bera sjálfir ábyrgð á því að boða vitni til þinghaldsins.

Endurrit þetta verður sent aðilum í símbréfi, til kæranda nr. 522 1309 og kærða 525 8709, og er þess óskað að þeir riti undir endurritið og endursendi í símbréf nr. 580 7901.

Fleira ekki gert, dómþingi slitið.

Þinghald 22. ágúst

Ár 2003, föstudaginn 22. ágúst, er dómþing haldið hjá dómstól KSÍ af Hilmarí Gunnlaugssyni dómara. Fyrir er tekið málið nr. 7/2003, Knattspyrnudeild Selfoss gegn Haukum, knattspyrnudeild. Dómþing þetta er háð á símatorgi Landssímans. Mættir eru í réttinn Jón Ágúst Jónsson unglingaráðsmaður hjá kæranda og Daði Rafnsson framkvæmdastjóri kærða.

Gögn málsins liggja frammi.

Á dómþingi þann 6. ágúst sl. var ekki mætt af hálfu kæranda. Féll málið því niður. Þar sem fyrirvarsmanni kæranda, sem er ólöglærður, hafði ekki verið kynnt með nægilega skýrum hætti hver áhrif útivistar væri, hafði dómari samband við hann utan réttar til að athuga með skýringu útivistarinnar. Kom þá í ljós að tilgangurinn var ekki að fella málið niður, heldur taldi kærandi að hann þyrfti ekki að mæta, þar sem sönnunarfærslan lægi hjá kærða.

Var því ákveðið að endurupptaka málið. Þrátt fyrir áðurnefnda útivist tók dómari skýrslu af vitnum þann 6. ágúst sl., þar sem hann hafði gert sér sérstaka ferð til Reykjavíkur vegna málsins og möguleiki væri á því að útivistin væri með þeim hætti sem síðar kom í ljós. Að beiðni beggja aðila og með sérstöku samþykki kæranda, er ákveðið að leggja umrædda skýrslutöku til grundvallar og endurtaka hana því ekki. Er málið því endurupptekið frá þeim tíma er skýrslutöku lauk.

Fer þá fram flutningur málsins. Fyrstur tekur til máls Jón Ágúst Jónsson f.h. kæranda, hann vísar í kærana, flytur málið að öðru leyti og leggur málið í dóm.

Þá tekur til máls Daði Rafnsson f.h. kærða. Hann ítrekar greinargerð sína og leggur málið í dóm. Aðilar óska ekki eftir því að veita andsvör.

Málið er tekið til dóms, sem kveðinn verður upp mánudaginn 25. ágúst n.k. kl. 17:00 og sendur aðilum sem símbréf.

Endurrit þetta verður sent aðilum í símbréfi, til kæranda nr. 522 1309 og kærða 525 8709, og er þess óskað að þeir riti undir endurritið og endursendi í símbréf nr. 580 7901.

Fleira ekki gert, dómþingi slitið.

Úrskurður Dómstóls KSÍ

Ár 2003, mánudaginn 25. ágúst, er dómþing haldið hjá dómstóli KSÍ að Kaupvangi 2, Egilsstöðum, af Hilmarí Gunnlaugssyni dómara. Fyrir er tekið málið nr. 7/2003, Knattspyrnudeild Selfoss gegn Haukum, knattspyrnudeild. Gögn málsins merkt nr. 1-4 liggja frammi í réttinum. Enginn er mættur í réttinn. Er nú kveðinn upp svofelldur dómur.

I.

Mál þetta er mótttekið af skrifstofu KSÍ 15. júlí sl. Kærandi er Knattspyrnudeild Selfoss, kt. 690390-2569, Engjavegi 50, Selfossi. Kærði er Haukar, knattspyrnudeild, Ásvöllum, Hafnarfirði.

Málinu var úthlutað undirrituðum dómara í dómstól KSÍ þann 17. júlí sl. Með símbréfi þann 18. júlí sl. var kærða gefinn frestur til þriðjudagsins 23. júlí til að skila greinargerð í málinu. Þann 25. júlí var málið þingfest og var aðalmeðferð málsins þá ákveðin í Reykjavík þann 6.

ágúst sl. Varð þá útvíst af hálfu kæranda, en vitni mættu þá fyrir dómara og gáfu skýrslu. Var málið að því gerðu fellt niður vegna útvistar. Kæranda, sem ekki er löglærður, var ekki leiðbeint um réttaráhrif útvistar. Í ljós kom skömmu eftir þinghaldið þann 6. ágúst að kærandi hélt ranglega að málið yrði tekið til dóms, þrátt fyrir útvíst. Ákvað dómari því að endurupptaka málið og var það gert þann 22. ágúst sl. Sama dag var málið flutt og dómtekið að nýju.

Dómkröfur kæranda eru að Selfossi verði dæmdur sigur í leik gegn Haukum í 4. flokki karla sem fram fór 10. júlí 2003.

Dómkröfur kærða verða ekki skildar á aðra lund, en að krafist sé að úrslit hins kærða leiks standi.

II.

Kærandi lýsir málavöxtum svo að leikmaður nr. 10 hjá Haukum Andri Geir Gunnarsson hafi verið rekinn af leikvelli með rautt spjald í leik Hauka og ÍBV. Hann hafi hins vegar leikið næsta leik í Íslandsmóti gegn kæranda, þrátt fyrir að hafa átt að fara sjálfkrafa í leikbann skv. reglugerð KSÍ um knattspyrnumót. Máli sínu til stuðnings hefur kærandi lagt fram leikskýrslur leikja 4. fl. Hauka við ÍVB og kæranda. Telur kærandi að lið kærða hafi því verið ólöglega skipað. Máli sínu til stuðnings vísar kærandi til greinar 4.3. í Reglugerð KSÍ um knattspyrnumót og greinar 5.2 í starfsreglum aganefndar KSÍ.

III.

Kærði lagði fram sem greinargerð í máli þessu bréf þjálfara 4. flokks. Þar kemur fram að umræddum Andra Geir Gunnarssyni hafi ekki verið vikið af leikvelli í leik ÍBV og Hauka, 4. flokki, A-lið, heldur hafi annar leikmaður komið inn á sem varamaður og borið sama númer og Andri Geir, þ.e. nr. 10. Þessi leikmaður heiti Kristján Karl og honum hafi verið vikið út af. Kristján Karl hafi hins vegar ekki verið á leikskýrslu A-liða, eins og Andri Geir. Síðan segir m.a.: "Þegar leiðréttá átti málið urðu málsatvik fyrst flókin og þegar kom í ljós að gleymst hafði að skrifa nafn Kristjáns Karls á leikskýrsluna bæði sem varamaður A-liðs og sem leikmaður í byrjunarliði B-liðs sem gerði mönnum enn erfiðara um vik að útskýra málin. Undirritaður hafði samband við KSÍ og ræddi þar við Klöru Bjartmarz starfsmann sambandsins sem tók vel í að skoða málið. Þegar hins vegar umrædd mistök urðu ljós með nafnaleysið á skýrslunni óskaði Klara eftir því að haft yrði aftur samband en þar sem hún væri á leiðinni í frí myndi Ómar Smáráson annar starfsmaður sambandsins taka við málinu. Eftir að undirritaður hafði ráðfært sig við bæði formann unglíngaráðs og framkvæmdastjóra knattspyrnudeildar Hauka hafði hann samband við Ómar þá strax eftir helgina sem sagði eftir að hafa hlustað á málsatvik að "þetta yrði ekkert mál" og því varð úr að Andri Geir var settur á skýrslu í næsta leik sem fram fór eins og áður sagði 10.07.2003."

IV.

Fyrir réttinn voru leidd eftirtalin vitni:

Andri Marteinnsson, þjálfari 4. flokks kærða.

Andri Geir Gunnarsson, leikmaður 4. flokks kærða.

Kristján Karl Þórðarson, leikmaður 4. flokks kærða og

Haraldur Sigfús Magnússon, dómari í leik ÍBV og kærða.

Framburðir Andra Marteinnssonar, Andra Geirs Gunnarssonar og Kristján Karls Þórðarsonar voru allir á þá lund að það hafi í raun verið Kristján Karl sem hafi verið rekinn út af í leik ÍBV og Hauka, en ekki Andri Geir.

Haraldur Sigfús Magnússon, dómari leiks ÍBV og kærða mætti fyrir réttinn og bar að hann hefði ekki þekkt leikmenn með nöfnum, en mundi glögg að hann hafði vísað Kristjáni Karli út af en ekki Andra Geir, þegar hann fékk að sjá myndir af þeim tveimur. Jafnframt upplýsti

dómarinn að hann hefði haft orð á því við þjálfara beggja liðanna að ólag hefði verið á númerum leikmanna, t.d. að tveir leikmenn í sama liði hafi borið sama númer.

V.

Það er óumdeilt að leikskýrsla leiks ÍBV og Hauka ber með sér að Andra Geir hafi verið vikið af leikvelli í umræddum leik. Þá liggur fyrir að á fundi aganefndar KSÍ þann 8. júlí sl. hafi Andri Geir Gunnarsson, Haukum, verði úrskurðaður í 1 leiks bann vegna brottvísunar í leik ÍBV og Hauka þann 30. júní sl. Dómari telur kærða hins vegar hafa sýnt fram á með vitnaleiðslum, að Andra Geir Gunnarssyni hafi ekki verið vikið af leikvelli umrætt sinn, heldur Kristján Karli Þórðarsyni.

Kærandi hefur í kæru sinni vísað til ákvæða 5.2 í starfsreglum aganefndar KSÍ. Í þeirri grein segir m.a.: "Leikmaður, sem vísað er af leikvelli, skal fara sjálfkrafa...".

Dómari telur kærða hafa sýnt fram á, að Andra Geir Gunnarssyni var ekki vikið af leikvelli í leik ÍBV og Hauka þann 30. júní sl. Því eigi ákvæði starfsreglnanna um sjálfkrafa bann án úrskurðar aganefndar ekki við í þessu tilviki.

Í 4. gr. Starfsreglna aganefndar KSÍ segir:

4.1. Aganefnd skal tilkynna úrskurð sinn strax að loknum fundi með tölvupósti eða símbréfi til formanns knattspyrnudeildar/ráðs eða þess aðila, sem félagið hefur tilkynnt KSÍ um. Úrskurður aganefndar skal einnig birtur á heimasíðu KSÍ strax að loknum fundi. Áhætta af mistökum við afhendingu tölvupósts eða símbréfs hvílir á móttakanda.

4.2. Úrskurðir aganefndar taka gildi kl. 12:00 á hádegi næsta föstudag. Óheimilt er að taka út refsingu, áður en úrskurður tekur gildi, nema um sjálfkrafa leikbann sé að ræða. Úrskurður um þingri refsingu vegna brottvísunar, þ.e. úrskurður um fleiri leiki í bann en kveðið er á um í 5.2., tekur ávallt gildi kl. 12:00 á hádegi næsta föstudags.

4.3. Ef augljóst er, að kveðinn hafi verið upp rangur úrskurður vegna villandi eða rangra upplýsinga í skýrslu dómara og/eða eftirlitsmanns eða rangrar skráningar ber skrifstofu KSÍ að leiðrétta þau. Aganefnd ber að taka slíka leiðréttingu fyrir á næsta fundi.

4.4. Úrskurðum aganefndar verður ekki áfrýjað.

Áður hefur verið vikið að því, að Andri Geir Gunnarsson lenti ekki sjálfkrafa í leikbann á grundvelli ákvæða 5.2. í starfsreglum aganefndar KSÍ, þar sem honum var í raun ekki vísað af leikvelli.

Aganefnd úrskurðaði Andra Geir í eins leiks bann á fundi sínum þriðjudaginn 8. júlí sl. Eins og að framan er rakið, tók sá úrskurður fyrst gildi kl. 12:00 föstudaginn þar á eftir, eða þann 11. júlí sl. Hinn kærði leikur fór fram fimmtudaginn 10. júlí sl. Verður því þegar af þessari ástæðu að hafna því, að Andri Geir Gunnarsson hafi verið í leikbanni í leik Hauka og Selfoss í 4. flokki A liða, sem fram fór þann 10. júlí 2002. Lið kærða var því ekki ólöglega skipað og verður ekki fallist á kröfu kæranda. Skulu úrslit leiksins því standa óhögguð.

Dómsorð

Úrslit leiks Hauka og Selfoss í Íslandsmóti 4. flokks karla, B. riðli, A-lið, sem fram fór þann 10. júlí 2003 að Ásvöllum, skulu standa óhögguð.

F.h. Dómstóls KSÍ,
Hilmar Gunnlaugsson